

Tele-kommt net



I ben jo net so leicht aus dr Fassung zom brenga. Die Oinzig wo des alle paar Jahr amol schaffat, send isch der Dilettantaverrei von dr Telekom. Mir hend neulich a schnellere Internetleitung beantragt und mitteilt kriagt, dass die ama bestimmte Tag omgestellt wird. Koi Wort drvo, dass des a paar Stond komplett abschaltet wird. Also, mir schaffat an sellem Tag ganz normal bis plötzlich im Zehne am Morga weder Interent noch Telefon duat. Bis om neine am

Obend dädat se's omschalta, hend se gschriebe. Also han i meine Mitarbeiter hoimgeschickt. Wo no om Zehna emmr no nix doa hot, han i bei bei der Telekomm agrufa. Dia hend aber gsait, dass do heut niemand meh do sei. Aberibr Nacht dät des bestemmt omgeschaltet werda.

Am näggschda Morga om siebane hot emmer no nix doa. Also hane wieder a'grufa. Dann kam die Ansage, dass se grad soviele Anfroga hättat, dass i später nomol arufa sott. Des hot sich bis halb zehne ogfährt 12 mol wiederholt. Om halb zehne endlich hane a sächsisch sprechende, völlig inkompetente Tussi dra ghet, die versprocha hot, dass se en ra halba Stond zrück ruft. Om halb ois han i wieder a'grufa, weil sich niemand gmeldet hot. Der Sachbearbeiter hot dann die Leitung gmessa ond feschtgstellt, dass nix durch goht. Des hätt i em au saga kenna. Er dät wieder zrückrufa hot'r gsagt. I soll drweil mein Router reseta. Hane gmacht. Hot aber nix gnützt. Des gleich Spiel hot sich bis halb neine am Obend sechs Mol (!) wiederholt. Bis i endlich en kompetenta, schwäbisch (!) sprechenda Ma an dr Leitung ghet han, der noch dr Prüfung tatsächlich zrückgrufa hot. Der hot no gmoint, jetzt dät er amol bei sich reseta dät. Dann hot's funktioniert. Des hätt mr scho beim erscha A'ruf han kenna, ihr gottsvermaledeite Soichbeitel ihr drhergloffane, eich soll doch dr Blitz beim Scheißa treffa, ihr wurmige Telefonixnutz.....

I wünsch a entspannte, kommunikative Woch'

Ihr

Alle Kolumna zom nochlesa ondr: www.woascht.de